

Regional News Unit AIR Aizawl

Thursday, May 23, 2024

Time - 7:30 -7:40Hrs

REGIONAL NEWS BULLETIN

HEADLINES (MORNING)

- Mizoram leh Myanmar inrinaa Friendship Bridge tunhnaia Assam Rifles ten an lo khar chu thleng nawn tawh lo se a duh a tih Chief Minister Pu Lalduhoma'n a sawi.
- Mizorama thar chhuah buhhum lei khawm chungchang Chief Minister hoin nimin khan sawiho a ni.
- Election Commission Of India (ECI) chuan BJP leh Congress President chu inthlan campaign chungchangah tihtur a hriattir.
- Calcutta High Court chuan kum 2010 hnu lama West Bengal sawrkarin hnam hnufual chhinchhiahna lehkha a pekchhuah chu a sutsak.

<><><>

CM

Sipai Lal, Lt. Gen. RC Tiwari-a nen an inkawmnaah Chief Minister Pu Lalduhoma'n Mizoram leh Myanmar inrinaa Friendship Bridge tunhnaia Assam Rifles ten an lo khar chu thleng nawn tawh lo se duh a tih a sawi.

Pu Lalduhoma chuan Lt. Gen. RC Tiwari, General Officer, Commanding - in- Chief, Eastern Command nen an inkawmnaah tun hnaiah Myanmar nena inrina chu Home Ministry leh Mizoram sawrkar hriatpui lohin khar a ni, a ti a, hetiang hmalakna hi thleng nawn tawh lo se a duh tih a sawi.

Chief Minister chuan Assam Rifles ten mipuite nunphung nghawng thei eng emaw thil tih an neih dawnin state sawrkar nen inrawntawna hma la zel turin a duh tih a sawi a. Zokhawsanga AR ram paltinga loneitute feh kawng thar laih chu an ngai pawimawh tih sawiin, AR Ground chu Aizawl lailia awm a nih avangin mipuiin an mamawh fo a, Politics thila punkhawm ni lo thil dangah pawh tun aia zalen zawka an hman theih a duh tih a sawi a. Mizoram sawrkarin nasa taka ruihhlo do tuma ke a pennaah nasa taka tanlakpui turin a sawm bawk a ni.

Lt. Gen, RC Tiwari-a chuan Mizorama awm sipaiten Chief Minister ngenna leh rawtna chu an ngaihpawimawh tur a ni, a ti a. Kawng tinrengah sawrkar an thawhpui dawn tih sawiin AR Ground hman chungchang chu a nau te a lo hrilh tur thu sawiin Zokhawsang ram pawh a rang lama ngaihtuah a nih tur thu a sawi a. Ruihhlo do chungchangah theihtawp an chhuahpui dawn tih a sawi bawk.

<><><>

MIZORAM PADDY & RICE PROCUREMENT COMMITTEE

Chief Minister Pu Lalduhoma kaihhruiin nimin khan Mizorama thar chhuah buhhum lei khawm chungchang sawihoin Agriculture Minister Pu PC Vanlaluata, Food, Civil Supplies & Consumer Affairs Minister Pu B. Lalchhanzova leh sorkar hnathawk pawimawhte an thu khawm.

He thutkhawmah hian Supply Minister Pu B. Lalchhanzova chuan sawrkarin buhfai lei leh hralh a kalpui thin dan chu tihdanglam hlek an tum a; Model Code of Conduct hlih a nih hunah a taka kalpui tan an tum dawn tih sawiin an kalphung thar turah kum tin sawrkar sum Cheng vbch 70 vel hum theih an beisei, a ti.

Thutkhawmah hian Minimum Support Price pe-a Mizoram loneitute tharchhuah buh hum, man man taka leisak chungchang sawi a ni a. Hemi kaihhnawih buh thar chhuah tihpun dan tur leh a chingtu tur thlana a chi in-ang chîn a tul dan leh leikhawm bakah a herna leh a phurh kual dan thlengin sawiho a ni a. Tripura leh Assam sawrkarin hetiang an kalpui dan report zirchiangtute hnen atangin ngaihthlak a ni a. Chipchiar zawka lo zirchiang tur team, Supply Minister kaihhruaina hnuaiiah din nghal a ni.



CM & MEFCOF

Chief Minister Pu Lalduhoma'n nimin khan a office-ah Mizoram Environment & Forest Consultative Forum (MEFCOF) hruaitute a kawm a; mahni sum leh pai senga ramngaw humhalh leh tuihna tihpunna lam buaipuitu MEFCOF chu pawl zahawm tak nia a hriat thu a lo hrih a. An ruahmanna te a hlawhtlin theih nan sawrkar pawhin thawhpui zel a tum tih lo hrihin, an ruahmannate chu ziaka thlen turin a chah a ni.

MEFCOF hian an bul tan nan kum 2004 khan Neihdawnah Zo Thei Huan an siam a, a hnuah Chawngtlaiah an din leh a, khaw hrang hrangah kalin ramngaw humhalh tulna an zirtir zel a. Zo Thei Huan Committee din zelin chung pawl te chuan an khaw Zo Thei Huan chu an enkawl zel a, tunah hian khaw 174-ah Zo Thei Huan an din tawh a ni.

An thupui ber chu 'khawih loh' tih a ni a. Khaw tinah humhalh theih ngaw awm te tha taka humhalha nungchate pawh zalen taka awmtir chu an tum ber a ni. Tuihna kâm zel a lo pun thar theih nana Rain Garden Policy an duan chu Chief Minister hmaah sawifiahin, Tlawng lui tuihna tipung tura pilot project kalpui an duh thu an thlen nghal a ni.

An pawl hruaitu Pu VL Bela hian kum 1975 atang khan Tlawng lui hi a hun leh hmun ngaiah kumtin tui san zawng a la teh ziah thin.



BIOLOGICAL DIVERSITY DAY

Mizoram State Biodiversity Board buatsaihin nimin khan Forest Training School Conference Hall, Bethlehem Vengthlang-ah International Day for Biological Diversity 2024 pualin hun hman a ni.

He hun hi Mizoram PCCF, AK Biswal -a'n a hmanpui a. Biodiversity humhalh a tul thu sawiin ram neitute leh a mi chengten biodiversity humhalhna lama an tih tur leh mawhpurhnate a tarlang a. Hemi kawngah hian nasa zawka tan la turin mipui a sawm a. Danin a phut angin mahni chanvo leh mawhpurhnate hlenchhuak thei theuh tura tanrual a pawimawh a, thangthar

lo awm zel turte chenna tlaka ram siam turin mimal tinin mawhpurhna an nei vek, a ti.

Kumina International Day for Biological Diversity thupui atan 'Ruahmannaah tel ve ta che' tih hman a ni a. He thupuiin a tum ber chu sorkar, khawtual leh tualchhung mi te, NGO, Dan siamtute, sumdawngte leh mimal tin ten Biodiversity Plan kalpui dan tur an thlawp dan te pholanna hun siamsak a ni.

Hemi ni puala essay inziahsiaak leh thusawia inelnaa lawmman la te hnenah lawmman sem nghal a ni.

<><><>

ECI DIRECTS BJP & CONGRESS PARTY PRESIDENTS TO CAUTION PARTY STAR CAMPAIGNERS FROM MAKING STATEMENTS VIOLATING MCC

Election Commission Of India (ECI) chuan BJP President JP Nadda leh Congress President Mallikarjun Kharge-te chu an party tana campaign-tu lian (Star Campaigner)-te hnenah Inthlan vuakveta khapna dan (Model Code Of Conduct) -in a khap bawhchhe thei thuchhuah kawnga fimkhur tura hriattirna lehkha siam turin a hriattir.

ECI chuan eng party leh candidate-te mah chi leh kuang inkara inrem lohna thlen thei zawnga che lo turin a hriattir a. BJP President hnenah chuan an campaign puipate chu vantlang tiphel zawnga tawngkam nei lo tura hriattir turin a ti a, rorel lai an nih ang pawha campaign dan phung zawm tha turin a hriattir a ni.

ECI chuan Congress party campaign puipate chu ram venhimna lam politics-a lalut zawnga campaign lo turin a hriattir ve thung a. India danpui nuaibo tum party an awm anga thuchhuah siam lo turin Congress President chu a hriattir bawk a ni. Campaign dan phung pangngai zawm tur leh India zahawmna ti-bawrhbang lo turin a hriattir a ni.

Hetianga ECI-in BJP leh Congress President a tih chhan hi inthlan campaign au-hla chungchangah party pahnihte hi an inhek tawn vang a ni.

<><><>

CALCUTTA HIGH COURT CANCELS ALL OBC CERTIFICATES GIVEN BY WEST BENGAL GOVT AFTER 2010

Calcutta High Court chuan kum 2010 hnu lama West Bengal sawrkarin hnam hnufual chhinchhiahna lehkha (OBC certificate) a pekchhuahte chu a sutsak.

He thupek hi nimin khan Calcutta High Court-a Justice Tapobrata Chakraborty leh Justice Rajshekhar Mantha chuan an chhuah a. OBC Certificate nuai 5 sut leh a ni.

Court chuan he thupek hian an certificate lo hmang tawhte chu a huam loh tur thu a sawi a. Tun atang erawh chuan mi tumahin he certificate hi sawrkar hna dilna atan an hmang thei tawh dawn lo thung a ni.

Court chuan sawrkarin OBC certificate a pekchhuah hian dan an zawm lo niin a sawi a. Court chuan Backward Class Welfare Commission chu kum 1993-a hemi chungchang dan tlawhchhana list siam turin thu a pe nghal bawk a. Chu chu state Assembly-ah thehluh leh tur a ni a. Assembly-in a pawm list-a hming chuangte chu tihchhuah leh theih a ni ang.

Calcutta High Court thupek hi Chief Minister Mamata Banerjee chuan a duhlo hle a, a tul a nih chuan Supreme Court-a a thlen tur thu a sawi.

<><><>

SEVERE HEATWAVE GRIPS RAJASTHAN; BARMER REMAINS HOTTEST AT 48 DEGREES CELSIUS

Nimin khan Rajasthan hmuntin deuhtawhah namen lovin khua a lum a. State chhung hmun tam takah a hma ni aiin degree 1 atanga degree 2 laiin a lum belh a ni.

Barmer chu a lum ber lai a ni a, a lum lai berin degree Celsius 48 a tling hial a. Falaudi, Churu leh Jaisalmer-ah pawh a lum ber laiin degree Celsius 47 a pel thuak thuak bawk.

Khaw lum hian state pumah nunphung a tikhaihlak a. A chhun a zanin dan pangngai aiin degree Celsius 5 atanga 8 thlengin khua a lum belh a. Met Department chuan ni 2 ni 3 lo awm tur chhung hian khua hi a la lum belh dawn niin a sawi.

<><><>

16TH MEETING OF INDIA-UK JOINT WORKING GROUP ON COUNTER TERRORISM HELD IN NEW DELHI

India leh United Kingdom tangkawp mi firfiak do pawl (India-United Kingdom Joint Working Group on Counter-Terrorism) thutkhawm wawi 16-na chu New Delhi-ah nghah a ni a.

Palaite hi Ministry of External Affairs-a Counter-Terrorism Joint Secretary K.D. Dewal leh Counter Terrorism Network for Asia and Oceania, Government of United Kingdom-a an hotu Chris Felton-ten an ho a ni.

Mifirfiak do kawnga ram pahnih thawhdun mekna chungchang an sawiho va. Mifirfiakte do tura zau zawk leh nasa zawka khawvel ram hrang hrangte thawhho tul an tih thu an sawi a ni.

<><><>